

REGLUGERÐ

26

29. febr.

um blöð og tímarit, sem flutt eru samkvæmt 1. gr. h í póstlögum (nr. 31/1940) og njóta sérstakra kjara um burðargjald umfram venjulegt prent.

1. gr.

Til blaða og tímarita, sem geta notið sérstakra kjara um burðargjald umfram venjulegt prent, telst sérhvert blað eða rit, prentað eða gefið út á Íslandi, sem menn skrifa sig fyrir, kemur út nokkurn veginn reglulega í að minnsta kosti 1000 eintökum í einu, og einu sinni eða oftar á ári í eintökum eða heftum, sem hafa sam-
eiginlegan titil og veга ekki yfir 500 g hvert.

2. gr.

Hámarksþyngd einstakra umboðssendinga eða áskriftarsendinga (sbr. 5. gr.) má ekki fara yfir 20 kg, og verður að vera innan sömu takmarka og bréf samkvæmt fyrir-
mælum Alþjóðapóstsamningsins. Á fyrstu síðu blaðsins eða tímaritsins skal prentað fullt nafn þess, árgangur, tölublað eða hefti. Ekkert laust fylgiblað, sem eigi er beinlínis tilheyrandi blaðinu að dómi póst- og símamálastjórnarinnar, t. d. sérprentaðar aug-
lýsingar o. þl., má senda með blaðinu eða tímaritinu, þótt á sé prentað eða stimplað nafn blaðsins eða tímaritsins, og getur brot gegn þessu ákvæði varðað stöðvun sendingar og missi réttar til póstflutnings samkvæmt þessari reglugerð.

Póst- og símamálastjórnin getur krafizt þess, að áskriftarsendingum sé raðað af sendanda, þannig að vinna á pósthúsi við sundurlestur og röðun verði sem minnst.

3. gr.

Til þess að blað eða tímarit sé flutt með pósti samkvæmt 1. gr. þarf það að full-
nægja settum skilyrðum og vera innritað hjá póst- og símamálastjórninni, en til þess að það verði gert, þarf útgefandi eða þeir, sem ábyrgð skulu bera gagnvart póst- og símamálastjórninni að gefa henni eftirfarandi upplýsingar:

1. Ósk um að blaðið eða tímaritið verði flutt samkvæmt 1. gr. h í póstlögunum, og hvort til umboðsmanns eða beint til áskrifenda eða að hluta til hvors.
2. Nafn blaðsins eða tímaritsins, ábyrgðarmanns og aðsetursstaðar.
3. Hve oft blaðið eða tímaritið komi út.
4. Á hvaða pósthús blaðinu verði skilað til flutnings.
5. Áætlaða þyngd hvers eintaks.
6. Áætlað magn í hvert skipti til umboðsmanna annars vegar, og beint til áskrifenda hins vegar. Enn fremur skal póst- og símamálastjórninni afhent eitt eintak af blaðinu eða tímaritinu sem sýnishorn, og innritunargjald greitt þegar innritun fer fram í fyrsta skipti, og síðan í byrjun janúar hvers árs, þar sem blaðinu eða tímaritinu er skilað til flutnings.

4. gr.

Innritunar- og burðargjald fyrir blöð og tímarit, svo sem að ofan greinir, skal ákveðið í gjaldskrá um póstburðargjöld, sem ráðherra setur.

Í hvert skipti sem blaði eða tímariti er skilað til flutnings á þennan hátt, skal greiða burðargjaldið í peningum og taka kvittun fyrir. Póstmaður, sem tekur við blaðinu eða tímaritinu til flutnings skal rita í póstkvittanabók fyrir blöð og tímarit nafn þess, árgang, tölublað eða hefti, dag og stund þegar það er afhent, þyngd hverrar sendingar, svo og fjölda þeirra eintaka í henni, er hafa sérstaka utanáskrift.

26

29. febr.

5. gr.
Blað eða tímarit, sem hér um ræðir, má flytja sem umboðssendingu, þ. e. beint til umboðsmanna í minnst 50 eintökum í einu til hvers, eða sem áskriftarsendingu, þ. e. beint til áskrifanda.

Blað eða tímarit, sem kemur út oftár en einu sinni í viku má ekki senda sem áskriftarsendingu til áskrifanda, sem dvelur á útgáfustað, ef þar er bréfburður oftár en einu sinni í viku, nema í einstakt skipti með leyfi póst- og símamálastjórnarinnar.

6. gr.

Blöð og tímarit, sem flutt eru samkvæmt reglugerð þessari og ekki er unnt að koma til viðtakanda, skulu eyðilögð á ákvörðunarpósthúsi, nema sendandi hafi óskað endursendingar þeirra og þá gegn sama burðargjaldi og fyrir venjulegt prent.

7. gr.

Eigi mega önnur pósthús taka við blöðum eða tímaritum til flutnings í pósti samkvæmt þessari reglugerð, en þau pósthús, sem útgefandi hefur tiltekið að þeim yrði skilað á.

8. gr.

Alþingistiðindi, Stjórnartiðindi og Lögbirtingablaðið má taka til póstflutnings með sömu kjörum og blöð og tímarit samkvæmt þessari reglugerð, þótt þau fullnægi ekki að öllu leyti ákvæðum þessarar reglugerðar.

9. gr.

Að öðru leyti gilda um þessar sendingar sömu reglur og um venjulegar prentsendingar.

10. gr.

Póst- og símamálastjórninni er heimilt að veita afslátt frá gjaldskrá um burðargjald fyrir blöð og tímarit, ef einhverjum eða öllum eftirfarandi skilyrðum er fullnægt:

1. ef útgefandi afhendir blöðin eða tímaritin ítarlega sundurlesin og röðuð, þannig að mannaflí sparist á pósthúsinu,
2. ef blöðin eða tímaritin eiga að flytjast með landpóstum í bréfhirðingar eða dreifast í bréfastu hjá mjólkurpöllum, en ekki að berast út í kaupstað eða kaupúni,
3. ef aðeins er um bílflutning tiltölulega stutta leið að ræða,
4. ef fleiri tölublöð í röð eru í sendingu til sama áskrifanda.

Enn fremur er póst- og símamálastjórninni heimilt að taka aukaburðargjald, ef útgefandi óskar að blöð séu flutt lofleiddis, en þó ekki hærra en sem nemur 50% af greiðslu póstsins til flugfélagsins.

Við ákvörðun afsláttarins skal þess gætt, að fjárhagsútkoma póstsins verði ekki lakari vegna þess heldur en fjárlög gera ráð fyrir, og enn fremur að sami afsláttur verði veittur aðilum, sem eins stendur á um.

Póst- og símamálastjórnin getur sett nánari reglur um þær póstsendingar, sem um getur í þessari reglugerð.

11. gr.

Reglugerð þessi gengur í gildi 1. marz 1960, og falla þá úr gildi ákvæði 23. gr. reglugerðar nr. 13/1925 um notkun pósta.

12. gr.

26

Reglugerð þessi er sett samkvæmt 1. gr. póstlaga nr. 31/1940 og varða brot gegn henni sömu viðurlögum og brot gegn póstlögum.

Póst- og simamálaráðherrann, 29. febrúar 1960.

Ingólfur Jónsson.

G. Briem.

AUGLÝSING

27

16. marz

um umferð í Reykjavík.

Samkvæmt ályktun bæjarstjórnar Reykjavíkur hafa bifreiðastöður verið bannaðar í eftirgreindum götum:

1. Smiðjustíg milli Hverfisgötu og Lindargötu.
2. Vesturgötu norðan megin götunnar milli Norðurstígs og Ægisgötu.
3. Tjarnargötu milli Kirkjustrætis og Vonarstrætis.

Enn fremur hefur umferð vörubifreiða, sem eru yfir ein smálest að burðarmagni, og fólksbifreiða, 10 farþega og þar yfir, annarra en strætisvagna, verið bönnuð um Laugaveg frá Snorrabraut, Skólavörðustíg neðan Bergstaðastrætis, Bankastræti og Austurstræti kl. 16—18 á virkum dögum öðrum en laugardögum, en þá gildir bannið kl. 10—12.

Þetta tilkynnist öllum, sem hlut eiga að máli.

Lögreglustjórinn í Reykjavík, 16. marz 1960.

Sigurjón Sigurðsson.

SAMÞYKKT

28

19. marz

fyrir vatnsveitufélagið Straumur, Hrunamannahreppi.

1. gr.

Félagið heitir Vatnsveitufélagið Straumur. Heimili þess og varnarþing er í Hrunamannahreppi, Árnassýslu.

2. gr.

Tilgangur félagsins er að sjá býlum á félagssvæðinu fyrir vatni.

3. gr.

Stofnendur félagsins eru ábúendur býlanna:

Grafarbakki I, Grafarbakki II, Hverabakki, Reykjabakki og Akurgerði.

Hver stofnandi greiði fimm hundruð krónur sem stofngjald og telst hann eigi fullgildur félagsmaður, fyrr en það stofngjald er greitt. Allt vatn í fjós, þvottahús og önnur þau hús, er heyra búrekstri jarðarinnar til, telst undir sama stofngjald og íbúðarhús.